

Riječ Redakcije

Cijenjeni čitatelji !

PRIJEDLOG O POKRETANJU JOŠ JEDNOG ČASOPISA u Institutu za istoriju u Sarajevu usvojen je na sjednici Naučnog vijeća od 26. 12. 2007. godine. Ime časopisa *Historijska traganja* određeno je naknadno, 10. 4. 2008. godine na sjednici istog znanstvenog tijela. Na stranicama ovog časopisa objavljuvat će se izvorni naučni radovi, pregledni članci, stručni prilozi i autorizirana predavanja održana na *Tribini Instituta za istoriju u Sarajevu*, planirana trećeg četvrtka svakog mjeseca u akademskoj godini.

Ime časopisa *Historijska traganja* odredit će i sadržaj u kojem će se nastojati prezentirati aktivnosti ljudi u prošlosti koje možemo prepoznati preko njihovih arheoloških i pisanih tragova, a čija upotreba ili oblik otkrivaju izvještaj ili pismeno svjedočenje o nekom događaju ili ljudima. Sadržajno, časopis nije ograničen starinom tragova, pratit ćemo ih do današnjih dana.

Za početak su otvorene dvije rubrike: *Članci* i *Predavanja na Tribini Instituta za istoriju u Sarajevu*. Članci neće biti ujednačavani opsegom, već će ovisiti od recenzentskog mišljenja. Objavljivanje predavanja sa *Tribine Instituta za istoriju* ovisit će od redovitosti njenog održavanja, ali i od raspoloženja predavača da povjere svoje tekstove ovom časopisu.

Zahvaljujući historijskim traganjima za prvi broj smo u rubrici *Članci* odabrali i prezentirali arheološke tragove naseobinske kulture na sarajevskom području u antičko doba; zatim arhivske tragove o lutanju Sarajevske hagade od 1894. do 1913. godine; nadalje, pisanje jednog časopisa o nastojanjima u građenju hrvatskog nacionalnog identiteta u Bošnjaka; a nakon toga, raspravu o opstanku i(li) nestanku spomeničke kulture iz Drugog svjetskog rata do danas, a u posljednjem radu, prezentirane su političke aktivnosti komunističke vlasti na planu administrativno-teritorijalnog uređenja poslijeratnog bosanskoher-

cegovačkog društva. U rubrici *Predavanja* tragom dostupnih historijskih izvora i sjećanja osvjetljava se velika političko-ekonomska "Afera Agrokomerc". Prema tome, časopis nije ograničen određenim historijskim periodom, ali ubuduće neće biti ni geografski definiran samo Bosnom i Hercegovinom.

Nakon ovih kratkih napomena, pozivamo vas na saradnju u traženju tragova prošlosti, njihovom prezentiranju i učenju o nama i drugima.

Redakcija